



Ingerlatseqatigiiffiit tamakkiisumik killilimmillu akileraartussaataasut il.il. akileraarutaassa ulloq 1. januaari 2019 aallarnerfigalugu 20 procentimut appartinneqarnissaanut isertitanut akileraarut pillugu Inatsisip allannguutissaanik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Randi Vestergaard Evaldsen, Demokraatit)
(Siullermeerneqarnera)

Demokraatit nunatsinni inuussutissarsiorneq nukittorsarusupparput. Isumaqarpugut inuussutissarsiortut namminersortut taakkuusut aningaasarsiornikkut uangutsinnik namminiilivitsississusarut piffissarlu qaninnerusoq isigalugu naalagaaffinngortitsissusarut. Inuussutissarsiortut namminersortut nukittorsarnissat Demokraatit sulineranni taamaattumik pingaarutilerujussuuvoq.

Ingerlatseqatigiiffiit akileraarutaannik appaanitsigut sulliviit pioreersut unammillersinnaassusarut periarfissaallu nukittorsassavagut. Suliffiutigit periarfississuagut patajaallisarnissaannut, ineriartornissaannut, suliniutinik nutaanik aallartitsinissaannut minnerunngitsumillu aningaasaleerusussuseq siuarsarneqassaaq. Siunissaq qaninnerusoq isigalugu tamatumap kinguneranik sulliviit amerlanerit pilersinneqassapput taamalu pisoqarpat inuiaqatigiit aningaasarsiornerat ataatsimut isigalugu aamma pitsanngoriassaaq.

Demokraatinut pingaartilluinnarparput ingerlatseqatigiiffiit akileraarutaannik appaanermi ajunaarutissat kisimik isigineqassanngitsut. Piviusorsiortuunaviannngilarmi taamatut isiginneriaaseqassagutta. Allatut ajornartumik ingerlatseqatigiiffiit akileraarutaannik appaanermut atatillugu amerlanerusut ataatsimut isigisariaqarpagut tassanilu Demokraatini qularutiginngilarput, savitussutsip pilersussap kinguneranik inuiaqatigiit aningaasarsiornerat ataatsimut isigalugu pitsanngoriarumaartoq.

Naalakkersuisut akissuteqaamminni toqqaannartumik savitussutsip pilersussap kinguneri upperinngilaat, Naalakkersuisullu Demokraatitulli ajoraluartumik isumalluartiginngillat pineqartoq pillugu. Naalakkersuisut paarlattuani tikkuarpaat sullivinni namminersortuni siuariartornissamut allanik periarfissaqartoq assersuutigalugu ilinniarsimassutsip qaffarsarnissaannut aningaasaliinikkut aamma attaveqaatinut aningaasaliinikkut. Tamatumani Demokraatini akerliunngilluinnarparput.

Taamaattuminguna timmisartunut sulusallit mittarfissaannut aningaasaliinissaq sakkortuumik tapersorsorigut aamma tamatigit anguniartuarparput meeqqat atuarfiani ilisimasat qaffarsarneqarnissaat. Aningaasaliinerilli taamaattut aningaasaliinerupput piffissaq ungasinnerusoq isigalugu.

Ingerlatseqatigiiffiilli akileraarutaannik appaanerut piffissaq qaninnerusoq piffissarlu ungasinnerusoq



isigalugit sunniuteqassaaq suliffiit periarfissaqalersussaammata aningaasaliinisaminnut taamaasillutillu siuariartornissaminnut, sullivinnut tamarmik akileraarutitigut isetit amerlinerannik kinguneqartussat. Iluuqutissarlu alla aamma pisussaq tassaavoq inunnik isumaginninnermut aningaasartuutit appassammata.

Naalackersuisut akissuteqarnerminni aamma allapput, ingerlatseqatigiiffiit akileraarutaannut tunngatillugu misissuititsiniarlutik tassungalu ilanngunneqarumaartoq ingerlatseqatigiiffiit akileraarutaasa qaffasissusaat. Demokraatini tamatumunnga atatillugu apeqqtigerusupparput misissuinissaq qaqugu aallartinneqalersaarnersoq qaqugulu naammassineqarumaarnersoq?

Misissuinerup pineqartup takutissagaluarpagu ingerlatseqatigiiffiit akileraarutaannik appaaneq inuiaqatigiit aningaasarsiornerannut kinguneqarluarumaartoq taava Naalackersuisut appaanissamut siunnersuuteqarnissartik eqqarsaatigisinnaanerlugu?

Siunnersuutip akuerineqarnissaa inassutigaarput innersuussutigalugulu Aningaasaqarnermut Akileraartarnermullu Ataatsimiititaliami suliareqqinneqassasoq.